

# INUIT ATAQATIGIIT

## Inatsisartuni



UKA 2018/82  
18.10.18.  
Peter Olsen

**Maannakkut ineqarnermut tapit pillugit malittarisassani isertitat tunngaviusarneri pinngitsoorani ilumut inunnut aningaasatigut pisariaqartitsinerpaaginnarnut atuunnersut pillugit allaaserinninnertalimmik misissuinnertalimmillu UKA2019-mi nassuiaammik saqqummiusseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Aamma ilanngunneqassaaq init ataasiakkaat ingerlanneqarnerannut aningaasartuutit piviusut aaqqissuussinerup qularnaartarnerai. Nassuiaammi aamma ilanngunneqassapput tigussaasut siunnersuutit innersuussinerillu Akileraartarnermut Atugarissaarnermullu Ataatsimiititaliap allaaserisai ineqarnermut tapiisarnermut tunngatillugu ataqatigiissaariniarnikkut ajornartorsiutaasartut ataatsimoortumik aaqqiiviginiarlugit.**

**(Inatsisartunut ilaasortaq Tillie Martinussen, Suleqatigiissitsisut)**

Inuit Ataqatigiinniit isumaginninnikkut aaqqissuusseqqinneq eqqupparput aningaasanut inatsit 2018-moortoq aqputigalugu. Massakkullu inatsisitai ulluni makkunani suliarivagut; Soorlu Imm. 17 assersuutigiinnarsinnaavarput, taassumalu ilaatigut imarai: ikiorsiissutinik naatsorsoriaatsip allangortinneqarnissaa, isertitaqarnerulernermi tummeraasatut (trappemodel) naatsorsuinani titarniusamik (lineær model) naatsorsueriaaseqalernissarput; Isertitaqarnerulernermi tassanngaan-nartumik ikiorsiissutit annikillipiloortannginnissaannut tunngasoq.

Inatsisissami pineqartumi siunertaasut ilagaat, pisortanit ikiorsiissuteqarneq peqqutigalugu “sulinaveersaartoqassanngitsoq” imaluunniit “sulinerunaveersaartoqassanngitsoq”

Aappaattut siunertarivaa ilaqtariit isertitakinnerit akunnattumillu isertitallit, meeraqqortunerillu ikiorseeriaatsimi tassani, aningaasaanik agguataarinneriaatititsinni (fordelingspolitik) tapersersorne-qarnerannik annertusaanissaq.

Inatsisissaq qulaani pineqartoq, siornali Naalakkersuisooqataanitta nalaani siuuttuuffigalugulu peqataaffiginikuugatsigu, taamaattumik Naalakkersuisut akissuteqaamminni isumaginninnikkut aaqqissuusseqqinnerit aallartereersimanerarlugit oqariartuuteqarnerat paasilluarparput ilassilluarparpullu.

Naak soorlu Naalakkersuisut oqaatigigaluaaraat isumaginninnikkut aaqqissuusseqqinneq aallartereer-simasoq tamannalu tunngavigalugu Tillie Martinussenip siunnersuutaanik itigartitsinissamik inassuteqaateqaraluartut, taamaattoq uagut Inuit Ataqatigiit Tillie Martinussenip siunnersuutaa ataatsimiisitaliamut ingerlateqqinneqarnissaa inassuteqaatigerusupparput.

Aap, isumaginninnikkut aaqqissuusseqqinnerit aallarteruttoraluarput, kisianni aamma eqqarsaatigil-luakkamik pilersaarusiorkuakkamik, ataqatigiissaarluakkamillu aaqqissuusseqqittoqarnissaa uagut Inuit Ataqatigiinniit kissaatigilluinnakka pingaartilluinnakkattalu ilagilluinnarpaat.

Pisortanit ikiorsiissutit pillugit inatsisit ataqatigiinngippallaarput (samspilsproblemer), taamaattumik pisortanit ikiorsiissutit pillugit tamakkiisumik aaqqissuusseqqinnissaq pisariaqarluinnarpoq (en samlet reform af sociale ydelser).

Inuit Ataqatigiinnit naalakkersuisooqataanitsinni kingullermi aaqqissuusseqqinnissamut suliap aallartarnissaa peqataaffigaarput; Meeqqanut tapit boligsikringimullu tunngasut aallartippavut. Taamaattorli....

Boligsikringimut tunngatillugu, eqqaamaneqassaaq ullumikkut imaappoq ineqarnermut akiliutissannarmut taamaallaat tapiissuteqartoqarsinnaammat. Innaallagissamut imermut kiassanermullu akiliutissamut tapiissuteqartoqarneq ajorluni. Eqqarsaatigisariaqalinnginnerparput ineqarnermut akiliutissap saniatigut aammali innaallagissamut imermut kiassanermullu akiliutissaq ilanngullugu tapiissuteqartoqartalersinnaanissaa?

Naggataavut; Inuit Ataqatigiit tunngavigaarput naalakkersuisunullu piumasaraarput aaqqissuusseqqinnerit;

A) Naligiinnerulernissamik siunertalimmik ingerlanneqassasut

B) Sulinerup imminut akilersinnaanerulernissaanik anguniagaqarnerup sukateriffigineqarnissaa.

Tillie Martinussenip siunnersuutaa allannguutissatut siunnersuuteqarfiginiarparput, siunnersuutatali siunnerfia soqutiginarpat ataatsimiititaliami sulinermi ilanngullugu qulaajaaffiginissaa kissaatigaarput. Pingaarnertulli siunnersuutaasumut ataatsimut isiginnilluni aaqqissuusseqqinnissaq pisariaqavissutut isigigatsigu allannguutissatut siunnersuuteqarpugut imaattumik:

**Nunatsinni ineqarneq pillugu aaqqissuusseqqinnissaq Naalakkersuisuniit suliaralugu aallartinneqassasooq, tassanilu aaqqissuusseqqinnermi inoqutigiit isertitakitsut aamma akunnattumik isertitallit siunissami akitigut inissiallu pitsaassusaatigut atugarisaasa pitsanngorsarneqarnissaat anguniarlugu Naalakkersuisut suliniuteqaqqullugit peqquneqarnissaat siunertaralugu Inatsisartut aalajangiiffigisassaattut siunnersuut.**

Taamatut oqaaseqarluta Tillie Martinussenip siunnersuutaa ataatsimiititaliamut susassaartumut ingerlateqqinneqarnissaa inassuteqaatigaarput.

Qujanaq

Peter Olsen Inuit Ataqatigiit